

四庫全書

集部

欽定四庫全書

唐文粹卷二十三

宋 姚鉉 編

贊上

總六首

帝王一

唐武宗皇帝真容贊

李德裕

將相功臣四

凌煙閣二十二勲臣贊

呂溫

三賢贊

司空圖

自題寫真贊

裴度

張荊州畫贊

呂溫

庶官一

右丞徐公寫真贊

獨孤及

唐武宗皇帝真容贊

井序

李德裕

仁聖文武至神大孝皇帝御極之五載氣應天和德感
人心朝廷四方咸一於正風雨時若螽螟歲息銷蓬宇

為休氣驅戎狄為懷人北荒堅昆重譯而至厥有寔代
憑阻弄兵陸梁韋顧既伐風沙自縛武功既成休德昭
明自古未聞百王莫致之事皆歲凝於圖謀矣皇上以
為大禹叙九疇敬五事豈不曰貌恭則莊視明則正予
欲作續傳照審其儀形且夫聖人潛心於天以通神明
先定其神而萬物理矣昔之訪具茨期姑射在此而已
況乎廣成之戒抱一玄元之去多欲予所貴道良為是
矣豈眩夫係風之言竒彼淖水之術從偃佺之所珍遺

堯舜之令名哉於是圖經素寫良金擬鑑形於止水若
凝視於清鏡五彩既彰穆穆煌煌居列仙之館近玄祖
之光蓋以昭燕翼之謀顯丕承之德矣臣聞古之至聖
必有奇相是以黃熊之瑞應於龍體赤精之符協於圖
表頎然而長文王所以王天下也體貌多奇漢高所以
威四海也然則續事之微極於惟肖至於天光晬清日
華明潤非可圖也庶髣髴焉末臣奉詔敢颺言曰

唐運中興天授大君軒耀其武堯煥其文北伐獫狁漢

朔無氛西伏堅昆稽首稱臣
稭生壺闕盜起河汾沈機
先物雄斷解紛克定羣慝
竟全大勲八表既寧萬機
並勤爰命采績載模天真
崑閬仙岑峻極秋旻蓬瀛
白日光照清晨涵育如天尊
嚴若神輝赫網緼為龍為
雲聖作物覩禎祥以臻宣
光乃孕虞熙載甄致建中和
金聲玉振太階既平廟器乃
陳化下以德持盈以仁四瀆
宗海衆星拱辰億萬斯年藻
朗日新

凌煙閣勲臣贊

井序 二十二首

呂 溫

我二后受成命撫興運乾坤軸撼乾樞鼓元氣而雷域
中騰百川而雨天下雷收雨霽如再開闢蕩焉與太極
同功貞觀十七年太宗以功成治定秉為而不有之道
讓德于祖考推勞于羣臣念匡濟於艱難感風雲於疇
昔思所以攄之無窮乃詔有司擬其形容圖畫於凌煙
閣者二十有四人蓋象乎二十四氣之佐天昭勲德也
昔者舜以五臣致理周以十亂反正高祖以三傑作漢
光武以二十八將中興若夫錯綜勲賢牢籠今古雄四

代而高視者其惟聖唐乎至若唐荅公劉渝公之倫探
元符建帝圖首戴神堯舉晉陽而活天下此則大禹之
拯溺也魏鄭公以致君為己任諫若不及蹇蹇左右秉
心宣猷此則咎繇之颺言也虞永興糾合羣儒旁求百
代明備王禮克諧帝樂使我大國煥乎其有文章此則
夷夔之制作也長孫趙公舉太義除二兇安宗廟定社
稷以振我丕赫無疆之休此則周公之匡救也英衛受
天勇智雄武佐聖鼓行海內麾定四方此則太公之鷹

揚也房杜玄機朗識並運帷幄神發響效謨成天功此則蕭何之指蹤也子房之決勝也尉遲秦程剛毅木訥氣鎮三軍力崩大敵匹馬孤劍為王前驅此則吳漢之樸忠賈復之雄勇也其餘皆棟棟殊材黼黻異制傳諸古烈固有慙德皇王之際於斯為盛其始也文為經武為緯智斯作忠斯述其末也大不偏小不遏退者全來者達控而縱之使自用之推而引之使自盡之不設籠檻以觀遼廓之致不頓韁鎖以極權奇之變執一德而

衆力展懸大信而羣情竭高祖聚之以義太宗用之以
道高宗終之以仁傳聖萬代享其功利此非盛歟昔陸
機袁宏為晉人而歌功於漢魏作者猶或稱之況乎遊
聖代觀國光目睨凌煙而頌聲不作某不揣賤劣有斐
然之志輒盡所蓄各為讚一章上以見王業之艱難中
以明聖賢之相須次以朗前哲之光韻末以聳後人之
誠節侯君集張亮負勲跋扈自陷大逆敢沒其名用彰
天刑使伐勞懷貳者懼春秋之義異姓為後故以河間

元王為贊首云

河間元王孝恭

太極構天本由一氣大人創業資我族類堂堂河間仁
勇是經邁駿有聲為唐宗英暴隋天亡羣盜猖狂我伐
用張時為哲王武有烈光為爪翼肺腸經綸八方

自南徂東晏海澄江

平蕭銑
輔公祐

使父兄帝天下化家為

邦用竭爾力寵臻其極言不伐色不德以遜以默築嘉
惟則佐高祖建大勳如周且與與太宗守大成如漢間

平宜君宜王盤石無疆

房梁公玄齡

梁公先覺龍卧待君長
彗流光掃天布新義師雷興公
躍其鱗杖策千里來謁帝
閭婉婉梁公實懿實聰實光
實融羽翼義忠若鸞若鴻
大風動地儒服從容靜運
曾中弛張折衝左右太宗
夷屯廓蒙定高祖功告武成
翊開太平我雖忘勞時靡有
爭網羅遺賢推轂羣英玉
不韜輝蘭無沈馨飛鴻出冥
振鷺在庭濟濟多士太宗

以寧公無事矣闕袞有補惟仲山甫經營四方方叔召
虎大邦鈞軸至則委汝閑居台輔撫默自處亦莫敢余
侮高朗令終嗚呼梁公

杜萊公如晦

穆穆萊公竒姿粹靈蘊元和氣為大國楨乘時恢能唐
室大開故人相攜

公與房梁公同
有匡濟之志也

直上太階更為陰陽

迭作日月佐明四海贊育萬物王度是欽如玉如金德
音惜惜萬有千古永稱房杜如周申甫

魏鄭公徵

堂堂魏公崇節大志喬幹直聳摩天自致遭風雲時得

霸王器一言委質有死無二撫我則后各盡其志

嘗事李密

隱太子

沈浮變通龍戰既息皇建其極俾補袞職其繩則

直諤諤嶷嶷危言正色保太宗德弼違替否日月不蝕

黜漢霸雜行周王道人或有言秉德不撓

與封德彝庭諍禮興

樂崇德合道豐保合太和昭明有融起四年中復三代
風言出化成神哉厥功尹躬佐商有恥于湯公以其志

匡飾聖唐為唐宗臣致唐無疆永式萬邦

長孫趙公無忌

趙國之先發祥朔土乃祖乃父受天之祜為天下母有
子而賢為唐宣輔聖賢同氣千載一覩丕顯趙公允文
允武克忠克仁實有大勲高祖受命太宗歸尊翼翼乾
乾恪居于藩羣孽亂嗣爭窺神器鴻業將墜公揭大義
一匡天地人到于今家受其賜帝將傳聖爰有顧命汝
忠汝誠莫與汝京與我聖子守唐太平公相高宗有太

宗遺風刑措財豐八荒來同和氣大融妖星襲月禍起
中宮公將正之以王帝躬武氏謀位公以力爭力屈羣邪誠阻天
聰黜非其尤令問無窮

唐荅公儉

歲寒陰凝冰雪皚皚有鳥擇木先陽春來誰歟荅公王
佐之材間運未開登潛龍臺代萬姓請命與天為媒扶
龍而興振起雲雷權輿帝圖經始唐基始覆一簣勃焉
巍巍易失者時難知惟幾知幾其神荅公元勲

劉渝公政會

河出崐崙來潤中夏連山合沓橫擁其派巨靈勃然手
摩太華決流東注功並造化粵我聖唐將舉晉陽帝命
是將往拯溺于四方亦既載旆亦既秉鉞強充當路王威

高君推拒不得發渝公慷慨感義激節用奇制變大事立

決雷奮霆越天衢八達則莫我敢遏如巨靈破山河勢
始豁赫矣渝公與神齊烈跡如仙掌炯炯不滅

李衛公靖

有隋之末羣盜熾藝帝怒震發五星從太白煥照參野
將有聖人兵定天下金精下射猛毅感激李公矯矯從

此奮跡躍于中原王者則獲壯士不死

初公不利於我帝欲戮之壯其

言而免壯士公自稱

唐威載赫帝曰汝傑致天之罰手付金鉞俾

往武遏不庭則殺如飈發如火烈烈摧枯爍雪應鼓
如截遠若荆巫險若江湖強若匈奴莫不率從莫不震
恭車書混同氛祲蕩空衛侯之功功則維何威明惠和
策勇駕智長驅仁義仁義曠蕩帝王之將萬古曷瞻鐵

山嶢嶢

詔築墳闕象
鐵山積石山

李英公勳

橫流莫極大亂無象英公傑出應運為將與楚楚霸與

漢漢王天時人事隨我所向長蛇縱蠱

王東

據河洛婪

婪封豕

建德

來濟同惡號吼連聲如雷如霆萬里震驚時

維英公諒我太宗斬豕以鉞取蛇于穴羣穢殄滅乃定

九鼎乃開明堂奄有大邦金甲同光告成于王

太宗獻
捷于高

祖與勳俱擢金
甲為上下將

皇業用昌帝命英公北伐儉狁雷鼓殷

殷旌頭幾殞掃雲黑山布唐陽春五原草綠不見南牧
島夷未庭天子親征其鋒維英莫拒莫抗是震是蕩破
東海浪天下既和解鞍投戈袞服委他華髮皤皤終始
三朝無玷可磨

劉夔公弘基

夔公崢嶸金虎之精應時而生與運俱行總帝元戎震
唐天聲瞋目張膽前無金城別建龍節中分虎旅啓行
萬里垂氣一鼓劍揮雷霆旆卷風雨先馳咸陽鎮定天

府天府既定唐集大命入揚王庭出權兵柄薄伐獫狁
朔風不競徂征島夷東海如鏡義始忠卒元勲之盛

長孫邳公順德

泰山未明雷鬱幽崖日觀赫開舒為丹霞昔我太宗賢
傑潛屯帝出于震爛其盈門邳公炳焉實耀其間功參
造物謀協先天執爻前驅捧轂南轅以勞以舊佐命之
元

虞永興公世南

英英永興華德素行以文富國以道佐命天下既定為
唐儒宗東觀石渠始生古風垂精繹思假道書圃驅馳
百代出入三古問義黃心聽堯舜語歸來帝側獻可替
否帝告永興與鴻碩之倫闡六籍三墳建樂章禮文先
師是宗於廓辟雍辟雍沈沈天子所臨或弦或歌講古
述今其從八千纓弁森森獬豸髦或詠德音羽林孤
兒亦垂青襟洋洋聲教無遠不洎日月所照皆成文字
鬱開古始掃蕩澆季賞我羣儒成太宗之志英英永興

宜曰文懿

尉遲鄂公敬德

僦僦鄂公百鍊龍泉沈翳未宣氣衝斗間佩非其人

初事

宋金剛躍入大川神武獲焉提之上天天地之內指麾無

前熊威虎力隱若敵國剛毅木訥安劉必勃武德之屯

手拔禍根掃除氛昏捧出日月耀于天門功成名遂高

謝戎事烈烈猛志化為和氣深地高堂頤性保命屑瓊

飲露靜奏清商商為臣勵事君鄂公之志之仁

貞觀後公不交

人事常鍊氣服食
奏清商樂以自奉

蕭宋公瑀

隋氏不君忠賢莫用桐生朝陽有集惟鳳捨彼頽厦鬱
為新棟路車玄袞開國有宋武德之暮羣孽內蠹巍巍
宋公聳節高步不吐不茹不來不去屹屹中立為天一
柱從容而言社稷遂安持誠秉忠光輔二君激濁揚清
欲人如身道至廣莫我敢羣境至大不容纖塵雪山倚
空冰壑照人耿介絕倫為唐貞臣

張郯公公謹

有倬郯公伋伋而貞僣僣而仁實太宗信臣有宗守藩
內難未夷圖之則安捨之則危帝臨安危機以懼以疑
以著為先知是筮是咨郯公巍然排闥折著抗憤正詞
用人事定天意身為元龜不知不識順義之則以定社
稷郯公之力公之云亡帝念其勤若痛在身天懷發中
哭不避辰君臣之間負古未聞

屈突蔣公通

五運相推土火革期隋化為唐忠臣不知猶驅義徒奮
拒王師指心誓天摩頸待時人歸有德四海皆叛春日
滿川流水未泮亡家殉國方寸不亂力屈勢窮排空落
翰東南慟哭聲盡魂斷仗忠就擒萬國瞻漢帝曰爾通
古之烈士孝於其親誰不欲子俾侯于將授以師紀感
恩不死宣力如彼佐唐扶隋名教之美

高申公士廉

維嶽降神佐唐生申忠貞自天孝友如春德為邦基仁

厚人倫肅肅雍雍真王者臣慶因歸妹光延天配

文懿
皇后

公之同
出也

婚媾之中雲龍潛會建公南海廊我無外諒我

撥亂弼文開泰遏彼庸蜀荐鍾澆季文翁之化若掃于
地申公攸徂有教無類父子兄弟望風相媿勃興儒雅
大復禮義西南頌聲到今不墜名登元勲理冠羣吏全
材大器於鑠厥懿

殷鄖公開山

溫溫殷公初若懦夫銅印試吏褒衣為儒大風驅雲忽

與之俱遭逢真宰參造化謨天地既闢厥功有赫從王
龔行佐帝光宅遠展驥足高揮鳳翮以永終譽垂于竹
帛

秦胡公叔寶

洛汭之役龍戰未決

我師與王世充陣于九曲

秦公應變臨陣電拔

銳氣盡來我盈彼竭成敗反掌存亡奄忽虎來風壯龍
轉山沒遂作心膂爰從討伐崩圍陷陣火迸冰裂翕如
鶚聲縱若鯨突功成國定萬古壯骨

程盧公知節

盧公倬然動軼幾先轉禍為福

與秦胡公降于九曲

攀龍上天續

翻鵬翼積風乃聳桓桓將軍大敵則勇雷崩山谷貌虎
頓伏颺倒溟波鯨鯢蹉跎見危而進當死不讓干城三
朝身老氣壯

段襄公志玄

襄公虎臣先運而臻謁帝太原許唐與身擁劍駕氣騰
風躍雲積忠累仁光有厥勲建旄北伐細柳宵屯風謐

霜凝嚴扃達晨天子之使駐車軍門軍屯肅章乃外壁門以夜不納制使
安衆秉威此真將軍侁侁桓桓克壯有聞

許譙公紹

羣動相食血流中原譙公夷陵豺虎為鄰列境連城火
炎煙昏皎其一邦如玉不焚三光忽開萬象皆新誰有
天下平生故人公與高祖有舊引忠歸誠豹變蠖伸金石之契

移為君臣奕奕煌煌為龍為光元戎啟行大旆央央式
遏大江奄征南方恩斯勤斯兩不可忘

三賢贊并序

司空圖

隋大業間房公季公魏公同師文中子嘗謂其徒曰玄
齡也志而密靖也惠而斷徵也直而遂俾其遭時致力
必濟謨庸厥後果然宜有贊激云

三賢志同夙尚儒風以植公忠出遇太宗諷議從容謀
厥羣雄君勞臣惕荒夷阻關百十年社稷

自題寫真贊

裴度

爾才不長爾貌不揚胡為將胡為相一點靈臺丹青莫

狀

張荊州畫贊

并序

呂溫

中書令始興文獻公有唐鯁亮之臣也開元二十二年
玄宗春秋高矣謂太平自致頗易天下縉覈稍怠推納
浸廣若君子小人摩肩于朝直聲遂寢邪氣始勝中興
之業衰焉公於是以生人為身社稷自任抗危言而無
所避秉大節而不可奪小必諫大必諍攀帝檻厯天階
犯雷霆之威不霽不止日月幾蝕卻為分明虎而冠之

不敢猛視羣賢倚賴天下仰望凜凜乎千載之望矣不
虞天將啓幽薊之禍俾姦臣乘衅以速致戎詐成讒勝
聖不能保褫我公袞置于侯服身雖遠而諫愈切道既
塞而誠彌堅憂而不怨終老南國於戲功業見乎變而
其變有二在否則通在泰則窮開元初天子新出艱難
久憤荒政樂與羣下勵精致理於是乎有否極之變姚
宋坐而乘之舉為時要動中上急天光照身宇宙在手
勢若舟楫相得當洪流而鼓迅風崇朝千里不足怪也

開元末天子倦于勤而安其安高視穆清霽然大滿於
是乎有泰極之變荊州起而扶之舉為時害動拂上欲
日與讒黨抗行于交戟之中勢若微陽戰陰衝密雲而
吐丹氣歟耀而滅又何難乎所痛者逢一時事一聖踐其
跡執其柄而有可有不可有成有不成況乎差池草茅沈
落光耀者復何言哉復何言哉曹谿沙門靈徹雖脫離世
務而猶好正直攜其圖像因以示余觀而感之仍作贊曰
唐有棟臣往矣其邈世傳遺像以覺後學德容恢異天

骨峻擢波澄東溟日照泰嶽具瞻崇崇起敬起忠貌與
神會凜然生風氣蘊逆鱗色形匪躬當時曲直如在胷
中鯤鱗初脫激海以化羊角中顏摩天而下無喜無愠
亦如斯畫嗚呼為臣儆爾夙夜

尚書右丞徐公寫真圖贊

并序

獨孤及

侍御史韓公至清以學藝書畫之美聞于天下辛丑歲
三月以王事靡盬館于豫章與前尚書右丞徐公同舍
於惠明寺之淨室嘗以暇日裂素灑翰畫徐公之貌陳

於公之座隅而美目方口和氣秀骨臺釐無差若分形
於鏡入自外者或欲擊跽揖讓俯俚拜謁不知其畫也
衆君子嗟歎之不足則言以讚其美某亦繼唱于後哲
匠運思天姿是具假之筆精實以神遇居然成象豁若
披霧瞻仰神鋒如窺武庫婉婉高識昂昂獨步絕頂孤
松空波白鷺不犯之色匪躬之故孰知其化亦在臺素



唐文粹卷二十三

欽定四庫全書

集部

唐文粹卷二十四

詳校官庶吉士謝恭銘

助教_臣常循覆勘

總校官檢討_臣何思鈞

校對官中書_臣陸 湘

謄錄監生_臣馮萬程

欽定四庫全書

唐文粹卷二十四

宋 姚鉉 編

贊乙 總二十八首

孝子一

二孝贊 李華

古賢四

四皓贊 梁肅

商山四皓畫圖贊

韋渠年

四皓後贊

李華

四公子贊

滿存實

名臣一

鳳閣王侍郎傳論贊

李翰

浮圖十一

三如來贊

梁肅

西方淨土變相贊

李白

藍田法池寺二法堂贊

張說

誌公畫贊

李白

達磨和尚法門義贊

釋皎然

天台和尚法門義贊

能秀二祖贊

誌公贊

唐大通和尚法門義贊

唐鶴林和尚法門義贊

李居士贊

李白

圖畫六

龍馬圖贊

柳宗元

騶虞畫贊

白居易

獬廌屏贊

畫鵬贊

怪松圖贊

陸龜蒙

金鄉薛少府廳畫鶴贊

李白

鷲鳥一

雙白鷹贊

蘇頌

絕藝一

裴旻將軍射虎圖贊

李翰

雅樂二

霹靂琴贊

柳宗元

琴贊

李白

橋梁一

蒲津橋贊

張說

二孝贊

并序

李華

靈武二孝曰侯知道程俱羅目不覩朝廷之容耳不聞
韶夏之聲足不登齊魯之境所見戎馬旃裘參於夷狄
而能生養以孝沒奉以哀穿墻起墳出於身力鄉人助
之者哭而反之廬於冢次號泣無節侯氏七年矣程氏
三年矣根於天性陶我孝理其至乎哉埃垢積首草生
髮間每大漠晨空連山夜寂人烟四絕虎豹與鄰擁墳

椎膺聲氣咽塞下入九泉上徹九天背爛心朽皮枯節
攣草木先秋而凋落景氣不時而凝閉殊鳥異獸助之
悲號萬物有極此哀無窮大哉二子能以孝終始乎語
曰孝如曾參不忍離其親生既不忍歿忍離之哉二子
之孝過於曾氏矣昔吳起忍與母盟陳湯忍匿父喪起
謀復楚霸而戮死湯功釋漢恥而囚廢神道昭昭若何
無報九州之衆誰非人子踐霜露者聞風永懷士有感
一諾一顧猶或與之死生嘉一草一木猶或為之歌詠

而況百行之宗終天之感乎華奉使朔陞欲親往弔焉
屬河凌絕渡願言不果憑軾隔川寄聲二孝同為贊一
章敢旌善人以附惇史其文曰

厥初生人有君有親孝於親者為子忠於君者為臣兆
自天命降成人倫背死不義忘生不仁愚及知就為之
禮文禮文不能節其哀繫道德之元純至哉侯氏創鉅
病殷手足胼胝成此高墳蔬果為奠茅蒲為茵其奉也
敬其生也貧大漠黃沙空山白雲柏庭既夕松路未晨

寇戎接境豺狼成羣夜黑颺動如臨鬼神哭無常聲迴
徹蒼旻風雨漂搖支體鱗皴色慘我蒿聲酸棘薪直斬
三年爾獨終身邑子程生其哀也均顧後絕配瞻前無
鄰冬十一月河冰塞津吾將弔之其路無因寄誠斯文
揮涕河濱

四皓贊并序

梁肅

道可佐皇而隘於帝治是以崆峒箕山之長揖於軒堯
也德宜輔王而偶生霸世則四皓之所以晦明於漢氏

也噫周道絕而王澤涸秦短世而漢雜興六合披攘兵
不暇戢則四公軒軒然鴻飛于冥時也天下大寶一人
攸繫苟茂嫡崇庶則亂是用長而公僂僂然俯定儲后
權也處則以時出則以權時以全已之道權以安天下
之器得非知幾者歟易謂知幾其神乎四公體之故曰
時合道合時塞道塞生非其時與道消息四公之謂與
贊曰

秦失其鹿豪傑並逐鸞鳳何依白雲深谷英英南山采

采紫芝漢以劍起吾誰與歸栖心化元澹泊無為禮物
雖至先生默而惟彼貞石確不可轉儲皇不妄我德用
顯大君是驚惠位是寧四公屈身天下和平弋者何思
鴻飛冥冥

商山四皓畫圖贊

并序

韋渠牟

故人清河房茂長刺商山成簡靜之化曰隱居之類也
畫茲圖以貺予緬乎沉吟想似之不足故為文以懿之

詞曰

煥煥煌煌為珪為璋孰光乎不耀之光幽幽深深為山
為林孰繫乎不繫之心足知乎虛室生自玄門不關流
水去住清風往還豈比夫稷卨在世巢由在山一物有
累兩心不開者哉閑之謂何簪裾薜蘿本不干我豈云
其他熙熙忻忻與時為春匡漢避秦惟茲四人于德之
鄰不孤其身于礪之濱不迷其津繪事既素孰知其故
想像儀形念茲丹青眊眊紫芝深谷逶迤俯仰今古空
林住時鳳豈無德鸞皆有羣出處語默商山白雲

四皓後贊

李華

時濁代危賢人去之商洛深山鷹鳳潛飛漢以霸興皇
王道衰玉帛雖至先生不歸吾非固然可動而起蹙眉
皓髮來護太子至尊動容奪嫡心已四賢暫屈天下定
矣返駕商山白雲千里

四公子贊

并序

潘存實

四君當齊楚趙魏之盛門客三千人聞者孰不慕之有
未達則孰不曰一朝富且貴必然嗚呼自四君歿千載

之間豈無貴於四君者豈無富於四君者而然者其誰
既富貴則曰彼四子徒沽名爾三千之人何為哉悲夫
人之貴也為身四君之貴也為人富貴皆知可及也而
富貴之心與貧賤之心不相負者愚則未見其及也贊
曰

四人為身萬二千人為耳目四人為梁萬二千人為榱
桷有危可平有死可生豈彼威憑實惟義爭嗟乎人之
家或財不自與心不自是妻不睦夫父不慈子而況乎

萬二千士懿哉恨目不覩此

鳳閣王侍郎傳論贊

并序

李翰

論曰王氏之先蓋出於有周自后稷公劉迨乎大王王季以至文武成康累聖重光以成王業故能卜世三十卜年七百天所命也下及靈王厥德雖衰而天命未改有太子晉者登仙于伊洛之間其後代子孫遂稱為王氏考其綿系不亦遠乎既而姬氏運窮戰國蜂起有錯為魏將翦為秦將咸以武功翊扶霸業宏謀遠略二國

賴焉自秦至漢有吉有駿為漢代名賢自漢至晉有覽
有祥為晉室公輔時徐州刺史呂虔檄祥為別駕虔有
佩刀工者相之以為三公之器虔謂祥曰苟非其人刀
或為害卿有公輔之量故以相與祥固辭不獲而後受
之祥在魏為司空太尉封睢陵侯晉武帝踐祚拜太保
爵為公年八十餘賜几杖不朝為國元老祥臨薨以佩
刀授其弟覽曰汝後必興足稱此刀覽拜光祿大夫封
即丘子門施行馬覽生撫軍長史裁裁生丞相始興文

獻公尊匡輔中興遷都建業元帝倚以宰衡之任而王氏盛於江左矣其正緒也則悅洽珣珉以弘雅清亮重於時其傍枝也則渾戎行經以曠達夷坦高於物若乃器宇崇邈風鑒昭朗則宋侍中左光祿大夫開府儀同三司特進豫寧文侯其人也忠肅恭懿宣慈惠和則宋侍中金紫光祿大夫開府豫寧忠敏侯其人也開物成務緯地經天則齊中書監尚書令太尉南昌文獻公其人也廉正澄絜恬虛簡潤則梁侍中金紫光祿大夫中

書令南昌安侯其人也美幹英姿通機敏藝則梁侍中金紫光祿大夫五兵尚書南昌章侯其人也博學高才鴻筆麗藻則周內史太子太保驃騎將軍開府儀同三司司空司徒石泉康公其也有典有則如珪如璋則隋安都郡太守石泉侯其人也道韻清穆德徽光劭則太子舍人荆王府司馬皇朝贈魏州刺史其人也其餘枝分葉散岳峙川流孝範忠規仁聲義烈女嬪帝子男尚王姬公侯保輔之尊令僕卿尹之貴紐龜鳴玉紫蓋

朱軒赫奕蟬聯繽紛菴藹市朝亟改而無替舟壑驟遷
而不易衣冠禮樂百代傳之而比肩人物風流四海望
之而延頸豈不美哉雖復魯三桓之子孫鄭七穆之宗
族晉之藥范齊之國高張氏之七葉貂蟬楊家之四世
台衮石奮石慶恭睿重規胡質胡威清廉疊軌父子儒
學桓榮與桓郁相承兄弟文章陸機與陸雲齊舉未足
以延茲家範麗我門輝所謂積善之家必有余慶盛德
必有百世之祀者也善乎郭景純之言淮水絕王氏滅

此非其效歟石泉公承積德之基挺舉和之氣髫鬋之
歲便能竭力以事親其性純篤率由而至精神朗晤特
異常童好學讀書略無懈倦常研味經史雖寢食有所
不遑纔及成童已為博達朋侶推薦束髮而就列焉厯
仕州郡咸以材能底績既以賢良文學舉又以夙行公
方進遂乃昇臺府拜卿僕三典名嶽一佐神州始學之
今得而行之以明察禦姦豪以慈惠撫孤弱以謹靖成
公務以清白杜私求珠玉非所寶脂膏不能潤故能

整綱肅紀不令而行千里應其言百姓歸其德所謂愷
悌君子人之父母者也及其翔鳳池執螭劍出納王命
弼諧帝猷理在將順怡然而奉旨事當進色侃然而犯
鱗常欲興禮制樂簡刑寬政獎儒術抑吏道正風俗厚
人倫乃蘧瑗之忠誠史魚之端操孟公綽之不欲季文
子之無私羊興祖之衣惟葛袍公孫弘之食惟粟飯陳
寵之奏藁咸削孔光之溫樹不言公之行事立名殆出
於數公之右矣由是特為上所親倚常以忠賢許之其

好古博學述作無倦之心於千載之表騁思於九流之域雖堆案盈机積訟充庭汗簡懷鉛晷刻無捨所莅之職由中及外或考其事或相厥土博採前志旁求故實輒加撰錄無或闕遺至以祖德家聲前言往行追述編紀動成部帙有忠孝之道焉有禮義之規焉有經邦之則焉有正家之訓焉固可以詒厥孫謀播乎長世者也易曰君子體仁足以長人嘉會足以合禮利物足以和義貞固足以幹事又曰君子進德脩業忠信所以進德

也脩辭立其誠所以居業也又曰君子學以聚之問以辨之寬以居之仁以行之詩曰瑟兮僖兮赫兮烜兮有斐君子終不可諼兮道盛德至善人所不能忘也又曰樂只君子邦家之基又曰嘉樂君子顯顯令德宜民宜人受祿于天若石泉公者可謂備君子之德矣其為聖朝輔佐受天之祿也宜哉贊曰

仙緒山賓靈液流津積德累仁生賢清神孝以事親忠以為臣履道正身秉國之鈞君子哉若人尚德哉若人

三如來畫像贊

并序

梁肅

法王之身有三曰法曰報曰應報身從無邊功德生應
身依無邊衆生生法身從如如無有生分別說三其極
一貫原夫大道之體離一切相是其本也積大德施大
惠合大道成大身是其報也出入十界隨所利見如水
月鏡是其應也自因至果故不得不有其報病一切病
故不得不行其應應亦名也報亦名也名乎哉其實相
之賓乎經云觀身實相觀佛亦然嘗試思之以為衆生

蓋反佛者也是三相在佛為三德在凡為三障一者生死生死即空寂空寂即法身也二者煩惱煩惱即智慧智慧即報身也三者結業結業即解脫解脫即應身也三德成於悟三障成於迷迷而不復也遂自絕於佛棄哀哉予嘗齋心命工裂素作繪聖德之形容可舉目而見見而後思思而後知至知至之路蓋由是矣瞻仰之不足遂為之贊庶觀者有以三如來不在心外不可以有無心取

大哉法體體如虛空不始不終不垢不淨不邊不中是
謂涅槃是謂法身諸佛性海无上正真

右贊毗盧遮那佛

妙哉報體體法而天由清淨功德色無礙德色無礙成
實智慧範圍法界盡未來際

右贊盧舍那佛

神哉化功萬化无方休有烈光以百億色身播百億國
土啟權顯實或默或語示我寂滅雙林之下

右贊釋迦牟尼佛

三聖一身本无有異恒沙諸佛其道一致衆生唯妄竟
妄斯至懸象著明用鑒心地

右總贊

金銀泥畫西方淨土變相贊

并序李 白

我聞金方之西日沒之所去中華十萬億刹有極樂世
界焉彼國之佛身長六十萬億恒沙由旬睂間白毫向
右宛轉如五須彌山目光清白若四大海水端坐說法

湛然常存沼明金沙岸列珍樹欄楯彌覆羅網周張車
璚瑠璃為樓殿之飾玻璃馬腦耀階砌之榮皆諸佛所
證無虛言者金銀泥畫西方淨土變相蓋馮翊郡太夫
人奉為亡夫湖州刺史韋公之所建也夫人蘊冰玉之
清敷聖善之訓伉儷義大希拯拔於幽塗父子恩深用
薰脩於景福誓捨珍物購求名工圖金創瑞繪銀設像
八功德水波動青蓮之池七寶香花光映黃金之地清
風所拂如生五音百千妙樂咸疑動作若已發願及未

發願若已當生及未當生精念七日必生其國功德因
極酌而難名贊曰

向西日沒處遙瞻大悲顏目淨碧海水身光紫金山勤
念必往生是故稱極樂珠網珍寶樹天花散香閣圖畫
了的眼願託彼道場以此功德海冥祐為舟梁八十一
劫罪如風掃輕霜諦觀無量壽長放玉毫光

藍田法池寺二法堂贊

并序

張說

法池西三歸院二法堂茲寺長老初上禪師所造也禪

師俗姓彭名知至性篤孝執親之喪七日不食微言密
行志道探玄究易老莊太一之旨善正書擅鍾王品格
其點畫宛秀毫縷必見如折槁荷磨文石筋理灑颯固
非人力之所致也中朝名士山數高尚法流開勝遠近慕
焉及晚年專意於禪頌生平藝業脫若遺塵矣常歎曰
帝王父母許我出家雨露生成恩惟一揆依如來教創
是功德萬一乎獻福二宮潛祐七祖將與一切咸登道
場於是三歸堂以長安元年辛丑子月望日癸未立善

法堂以開元元年癸丑正月望日戊辰建禪師母弟仁
琬弟子沙門啟疑及沙彌令哲左右斯業實有力焉乃
作二法堂贊

三歸堂贊

敬告諸佛子一心清淨觀欲求正真道當從信根入是
佛虛空相是法微妙光定慧不相離是僧和合義人空
法亦空二空亦復空住心三空實是名三歸處

善法堂贊

至哉初上人建立善法堂彩翠三世佛莊嚴清淨眼能
運無礙心普入於一切見若不染色知若不取識是名
真實見亦名解脫知佛觀離生滅諸法等如是

誌公書贊

李 白

水中之月了不可取虛空其心寥廓無主錦幪鳥爪獨
行絕侶刀齊尺梁扇迷陳語丹青聖容去住無所

六贊

釋皎然

達磨和尚法門義贊

我師西來傳乎真訣大輪當路小乘亡轍冥冥世人初
見日月權跡有歸光雲不滅

天台和尚法門義贊

我立三觀即假而真如何果外強欲明因萬象之性空
江月輪以此江月還名法身

能秀二祖贊

二公之心如月如日四方無雲當空而出三乘同軌萬
法斯一南北分宗工言之失

誌公贊

大動之地我安其中高景無氛靈鶴在空出生死泥隨
物有終務形骸俗借績開蒙常攜刀尺精意誰通

唐大通和尚法門義贊

觀淨之筌斯言不住四色蓮花白花為喻應知離相或
未圓通吾師惠心雲開天空

唐鶴林和尚法門義贊

真見之體知而不知性猶無主禪何有支我本圓寂湛

而不移聿來化人慈力所為

李居士

李白

至人之心如鏡中影揮斤萬變動不離靜披質我斤揮
風是騁了物無二皆為匠郢吾族賢老名喧寫真貌圖
粉績生為垢塵從白得衰與天為鄰儼然不語長存此
身

龍馬圖贊

并序

柳宗元

始吾聞明皇帝在位靈昌郡得異馬于河而莫知其形

好事者涿人盧遵以其圖來示余其狀龍鱗虺尾拳髯
環目肉鬣馬之靈怪有是邪居帝閑幾二十年從封禪
郊籍鳴和鑾者數十事遇亂帝西幸至咸陽西入渭水
化龍泳去不知所終且其來也宜于時其去也存其神
是全德也既覩其形不可以不贊

靈和粹異孕至神兮保尾童鬣疏紫鱗兮巍然特出瑞
聖人兮理平和樂百禮陳兮鳴鑾在御大路遵兮世尤
道悖還吾真兮哀鳴延首渭水濱兮沛馬潛泳旋翮淪

兮淵居海逝靈無鄰兮出處孔時類至仁兮嗟爾衆類
孰是倫兮進昏死亂陷厥身兮匪馬之慕吾誰親兮贊
之斯圖宜世珍兮

騶虞畫贊

井序

白居易

騶虞仁瑞之獸也其所感所食暨形狀質文孫氏瑞應
圖具載其事元和元年夏有以騶虞圖贈予者予愛其
外猛而威內仁而信又嗟曠代不覿引筆贊之詞曰
孟山有獸仁心毛質不踐生芻不食生物有道則見非

時不出三季以還退藏於密我聞其名徵之於書不識其形得之於圖白質黑文貌首虎軀是邪非邪孰知之乎已矣夫已矣夫前不見其往者後不見其來者于嗟乎騶虞

貘屏贊

并序

白居易

貘者象鼻犀首牛尾虎足生南方山谷中寢其皮辟瘟圖其形辟邪予舊病頭風每寢息常以小屏衛其首適遇畫工偶令寫之按山海經此獸食鐵與銅不食他物

因有所感遂為贊曰

邈哉奇獸生于南國其名曰獬非鐵不食昔在上古人
心忠質征伐教令自天子出劍戟省用銅鐵羨溢獬當
是時飽食終日三代以降王法不一鑠鐵為兵範銅為
佛像像日益兵刃日滋何山不剗何谷不墮銖銅寸鐵
罔有孑遺悲哉彼獬無乃餒而嗚呼匪獬之悲惟時之
悲

畫鵠贊

并序

白居易

壽安令白昊予宗兄也得丹青之妙傳寫之要毛羣羽
族尤是所長長慶元年以畫鵬貺予予愛之因題贊云
鷺禽之英黑鵬丁丁鉤綴八爪劍插六翎想入心匠寫
從筆精不卵不鵬一日而成軒然將飛晏然欲鳴毛動
骨活神來著形始知造物不必宵冥但獲天機則與化
爭韓幹之馬籍籍知名薛稷之鶴翩翩有聲斫工覈能
較真鬪靈豈無他人不如我兄

怪松圖贊

并序

陸龜蒙

有道人自天台來示余怪松圖披之甚駭人目根盤于
巖穴之內輪囷逼側而上身大數圍而高不四五尺礪
砢然蹙縮然榦不暇枝枝不暇葉有若龍寧虎跛壯士
囚縛之狀道人曰是何物怪如是耶予能辨之乎余曰
草木之生安有怪耶苟肥瘠得於中寒暑均於外不為
物所凌折未有不挺而茂者也矧松柏乎今不幸出於
巖穴之內脆者則磴然之牙伏死其下矣何自奮之
能為是松也雖稚氣初拆而正性不辱及其壯也力與

石闕乘陽之威悲已之軋拔而將升卒不勝其壓擁勇
鬱遏全憤激訐然後大醜彰於形質天下指之為怪木
吁豈異人乎哉天之賦才之盛者蚤不得用於世則伏
而不舒薰蒸沉酣日進其道權擠勢奪卒不勝其阨號
呼吸拏發越赴訴然後大奇出於文彩天下指之為怪
民嗚呼木病而後怪不怪不能圖其真文病而後奇不
奇不能駭於俗非始不幸而終幸者耶道人曰然為我
贊之贊曰

松生陰隘巖獄穴械病乎不快卒以為怪擁腫支離神
羞鬼疑道人嗟咨筆傳其奇或怪其形或奇于辭吾為
怪魁是以贊之

金鄉薛少府廳畫鶴贊

李白

高堂開軒兮雖聽訟而不擾圖蓬山之奇禽想瀛洲之
縹緲紫頂煙絕丹眸星皎昂然佇眙霍若驚矯形留座
隅勢出天表謂長鳴於風宵終寂立於霜曉凝翫並古
俯察逾妍舞疑傾市聽似聞弦儻感至精以神變或可

弄景以浮煙

雙白鷹贊

并序

蘇頌

開元乙卯歲東夷君長白肅脊扶餘而貢白鷹一隻其
一重三斤有四兩其一重三斤有二兩皆皓如練色斑
若綵章積雪全映飛花碎點所謂金氣之英瑤光之精
高髻偉臆長距秀頸奮發而銳堅剛則厲摩天絕海雷
擊颺逝觀其行時令順秋殺指麾應捷顧盼餘雄當落
鵬之賞茂仇鷁之敵實稀代之尤也皇上祗膺聖圖欽

若王道方實賢重穀尊儒食父後官撤綺繡前殿焚珠
玉與王侯卿士朝夕論思異無所貴輕衛公之好鶴竒
無所珍同漢皇之卻馬畋豈務於馳騁獵以存乎蒐狩
未嘗合圍掩羣載羽洒血乃強不攫而猛不噬矣然以
萬方入貢懷其來也三年重譯嘉其至也故仁為之心
有仁則勇威為之力有威則重況此鳥猛過於衆重倍
於凡禮於君則勸忠祭於祖則立敬壯其體則用武絳
其翼則成文彼寵而服之鵠也能果榮而戴之蟬也能

繫矧乎職命司寇師惟尚父聞箴刺姦擇善為吏蓋選士之是式匪從禽之足云此謂備於圖而儆在位也微臣奉制敢稱贊曰

鷹之大者精明竦峻勁而橫絕雄則遠振錦文素綵珠聯玉潤往乃奮威將軍所徇鷹之次者勇銳光芒截海而至乘風載揚絡以紅點文其綵章下韉必中惟吏之良

裴昊將軍射虎圖贊

并序

李翰

世稱裴將軍射虎而不及見駕部郎中兼侍御史滎陽
鄭公博物好古旌能尚藝于裴氏子得其先人射虎圖
傳以示予壯哉古今之未有倫也夫弧矢之用所以服
猛除暴而威戎狄故士生則以蓬矢射四方君立則以
五侯選諸侯五侯之正皆飾以熊虎猛獸之皮象而射
之也昭除暴不若也周官曰張五侯則遠國屬射而中
之威不廷也昭昭乎除暴威遠之義蓋射之大端若殺
不加有罪威不及不庭雖有百中之功而無一發之矢

發弓鳥下拾矢後號工則工矣是射之末節開元中山
戎寇邊玄宗命將軍守北平州且充龍苑軍使以捍薊
之北門公嘗率偏軍橫絕漠策匹馬陷重圍搖轆轤而
百萬洞開驅橐駝而沙場一掃聲振北狄氣懾東胡稜
威大矣而北平連山廣野地實多虎擇肉於人如有飛
翼荐食邊鄙甚於戎夷羣老憂而請焉公於是屏車徒
去矛鉞曰賈子餘勇挺身以餌之眈眈虺虺烈烈騰迹
當其威怒也百獸以伏萬夫莫亢而公馳單騎發白羽

挑之使來翼之而迴從容返視咫尺旋翫心即其度手
張其機左射右拂縈之疊四中皆沒羽倒必應弦毛紛
血灑腋洞心穿或叱之而弭伏或箠之而卻走將威有
所勝氣有所全精專於中志正於內故能以一人之力
戰羣虎之命使鋸牙鉤爪戢而莫措雷聲電視消而不
揚猛摧於衆衆怯於獨其為易也若獵狐兔聯鶩鷺雖
有矯牙冠羣亦垂頭搨尾應鏑而斃如此者凡三十有
一矣其餘竄匿不敢復出大漠之南千里罷局鳥獸咸

若山川以寧胡人服藝畏威不敢南牧願充麾下者五百餘人茲所謂剛猛除暴而我狄格昔漢飛將軍亦為北平守擊胡有困辱之事射虎有騰傷之患其與將軍神勇非為侔矣鄭公既寫其圖俾予贊之詞曰

憬彼山戎噬我封略有羣者虎載肆騰搏遑眎懔懔若崩厥角將軍出塞屏黜車騎進馬前當挺身以餌威有所服精有所聚氣全以雄力果而取震驚雙雙虎反如鼠威武桓桓人反如虎勁弓雷霹長矢電激中口穿脅

貫心洞腋視如空皮劃若破的應發連斃紛紜枕藉據
鞍遙叱揮箠逆擊閉目沈冥喪精擗易三軍駭呼萬靈
動魄海波為騰塞草皆赤卞莊俟闕方聞兩獲漢將如
飛幾為所扼將軍神勇冠世超昔號後未工飲羽非敵
弧矢之設以威四方羣虎既夷狄人來降收闔罷扁山
川以寧至今北荒猶畏其靈

霹靂琴贊

并序

柳宗元

霹靂琴者零陵湘水西震餘枯桐之為也始枯桐生石

上說者言蛟龍伏其竅一夕暴震火之焚至旦乃已其餘磴然倒卧道上震旁之民稍柴薪之超道人聞取以爲三琴琴莫良于桐桐之良莫良于生石上石上之枯又加良焉火之餘又加良焉震之于火爲異是琴也既良而異合而爲美天下將不可載焉微道人天下之美幾喪余作贊辭識其越之左與右以著其事又益以序而爲它傳辭曰

惟湘之涯惟石之危龍伏之靈震焚之奇既良而異爰

合其美超實為之贊者柳子

琴贊

李白

嶧陽孤桐石聳天骨根老冰泉葉苦霜月斷為綠綺徽
聲繁發秋風入松萬古奇絕

蒲津橋贊

張說

易曰利涉大川濟乎難也詩曰造舟為梁通乎險也域
中有四瀆黃河居其長河上有三橋蒲津是其一隔秦
稱塞臨晉名關關西之要衝河東之輻湊必由是也其

舊制橫絕百丈連艦千艘辦脩竿以維之繫圍木以距之亦云固矣然每冬冰未合春洳初解流澌崢嶸塞川而下如礎如臼如堆如阜或捥或捫或磨或切綆斷航破无歲不有雖殘渭南之竹仆隴坻之松敗輒更之罄不供費津吏成罪縣徒告勞以為常矣開元十有二載皇帝聞之曰嘻我其慮哉乃思索其極敷祐于下通其變使人不倦相其宜授彼有司俾鐵代竹取堅易脫圖其始而可久紓其終而就逸無疆惟休亦無疆惟恤於

是大匠藏事百工獻藝賦晉國之一鼓法周官之六齋
飛廉煽炭祝融理爐是鍊是烹亦錯亦鍛結而為連鎖
鎔而為伏牛偶立於兩岸襟束於中渾鎖以持航牛以
繫纜亦將厭水物莫浮梁又疏其舟間畫其鷁首必使
奔澌不突積凌不隘新法既成永代作則原夫天意有
四旨焉濟人仁也利物義也順事禮也圖遠智也仁以
平心義以和氣禮以成政智以節財心平則應諧百神
矣氣和則感生萬物矣政成則入文之經矣財節則豐

武之德矣故天將儲其禎地將阜其用人將盈其力聖
皇之道乾乾翼翼觀藝而無窮詠功而無極

唐文粹卷二十四